



*Rabu, 12 Mei 2021*

**Ogen: Perngandungen 4 : 1-22**



**Emas Salih Jadi Kudin Taneh**



Indah pada waktunya, enda me kata si megati jadi pergegeh man banta tupung kita ngalaken perbeben entah lenga seh bagi sinisuraken kita, tetap lit pengarapen dinger sitimai waktu Tuhan, labo waktunta, sebab lit pagi paksana maka Tuhan mereken si mehulina ibas kegeluhenta.

Bagemepe igambarkan Jerusalem si nai enggo iukum Dibata, lebihen asangkan kalak Sodom tupung iukum Tuhan, kecedan si reh nderpa bangsa enda seh hantuna enterem kalak mate lumben perban la lit simanpangan, imam ras pemimpin lanai iperdiateken Tuhan. Musuh sangana ngempangi bangsa enda seh maka lanai banci erdalan arah dalam jelma sienterem, wari pendungi enggo seh me.

Kai si nai iakap desken emas kedungenna enggo magem, anak perana i Sion nai desken emas tapi gundari seri nge ras kudin taneh erkiteken enggo meripuk pecah ras lanai banci nuduhkan bentukna selaku kudin. Bageme bangsa Israel kenca ndabuh ras runtuh mulihi. Kerina radas, pengarapen pe enggo ndauh ibas Dibata nari. Enggo genep ukumen dosa Sion tangkas me kerina iadepen Tuhan, tangis dinger ngandung getem kal pusuh perukuren bangsa enda ngidah kai si jadi. Jerusalem la terjeng runtuh tapi pe jelmana kerina renduk erkiteken talu, erkadiola pe lanai lit gunana.

Arah renungenta kita nggargari dirinta ula min sempat kita talu ibas perbebenta, anem gia iajapa nari pe reh perbebenta ula kita medu ibas erpengarapen man Tuhan, tetaplah megenggeng sabab lit nge paksana Tuhan erdahin ibas kegeluhenta alu caraNa si la pernah iduga kita. Anemgia ibas renungenta enda Emas salih jadi kudin taneh, bahanlah arah pengarapenta Kudin taneh salih jadi Emas.